

VI Concurso literario *Mazarelos*

Co obxectivo de fomentar a creatividade da mocidade universitaria e de desenvolver a súa capacidade de expresión en lingua galega, así como para contribuír a descubrir potenciais figuras deste eido da cultura, a Comisión de Normalización Lingüística da Facultade de Filoloxía convoca o **VI Concurso Literario Mazarelos**, nome que lembra e homenaxea as raíces da Facultade e mesmo da Universidade e da propia Compostela, de acordo coas seguintes

BASES

1. Participantes

Poderá participar o estudiantado de grao, mestrado e doutoramento que estea matriculado na USC en calquera momento do ano 2020 anterior á finalización do prazo de presentación.

2. Obras

Admítese calquera xénero literario ó redor do tema: ***o galego en confinamento***.

Os textos deberán ser orixinais, escritos en lingua galega, inéditos e non premiados noutros concursos. Tampouco non se poderán presentar a outros concursos durante o período desta convocatoria ata que se publique a decisión do xurado.

Cada participante só poderá presentar unha obra.

As/os concursantes deberán achegar unha declaración na cal garantan a autoría da obra e que os seus dereitos non están comprometidos nin pendentes de veredicto en ningún outro concurso literario. Esta declaración estará incluída no formulario de autoría que se publicará na páxina web do premio, que se atopa dentro do sitio web da Facultade (www.usc.gal/filoloxia/).

Estabéllese un límite máximo de 30 páxinas DIN A4 mecanografadas, cunha extensión máxima de 9.000 palabras. Non hai límite mínimo.

3. Presentación das obras

As obras deberán presentarse nun sobre pechado no enderezo *Decanato da Facultade de Filoloxía, Avda. Castelao, s/n. Campus Norte, 15782 Santiago de Compostela*. A entrega poderase facer directamente no Decanato, ou nos rexistros xerais da USC en Santiago e Lugo, ou ben por correo postal certificado.

No exterior do sobre pechado constará a mención “VI Concurso Literario Mazarelos”. No seu interior achegaranse cinco copias da obra presentada ó concurso sen asinar e sen figuraren nela datos persoais e, alén diso, un sobre pequeno, tamén pechado, co nome da obra e o lema ou pseudónimo do/a autor/a no exterior, e no interior o formulario de autoría que se atopará na web da Facultade de Filoloxía, concretamente na ligazón

www.usc.gal/filoloxia/, cos seguintes datos: nome e apelidos, correo electrónico, teléfono de contacto e número de conta bancaria (IBAN) da cal for titular, así como o título da obra e lema ou pseudónimo.

4. Prazo

O prazo de presentación remata na sexta feira 25 de setembro de 2020 ás 14:00 horas.

5. Xurado

O xurado estará integrado por cinco membros elixidos e nomeados pola Comisión de Normalización Lingüística (CNL) da Facultade de Filoloxía. Tres deses membros serán elixidos entre o PDI da Facultade, procurando que polo menos un deles pertenza á área de Filoloxías Galega e Portuguesa. Os outros dous membros serán escritores/as sen relación actual coa Facultade. A/o presidenta/e será elixida/o de entre as/os profesoras/es polas/os propias/os integrantes do xurado. A composición do xurado darase a coñecer na data de publicación da súa decisión.

A decisión do xurado será inapelábel.

6. Resolución e premios

Estabelécense os seguintes premios:

1º premio: 700 euros e diploma

2º premio: 400 euros e diploma

3º premio: 200 euros e diploma

Os premios están suxeitos á lexislación fiscal vixente.

A organización, a proposta do xurado, poderá declarar desertos algúns dos premios, ou, de se-lo caso, amplialos concedendo os accésits que considerar oportunos e que consistirán en diplomas.

A resolución do concurso comunicaráselles persoalmente ás persoas gañadoras e tamén será publicada na web da Facultade, accesíbel na ligazón: www.usc.gal/filoloxia/.

Valorarase así mesmo a posibilidade de publica-las obras premiadas.

Polo feito de participaren, os/as autores/as cédennle expresamente á Facultade de Filoloxía da USC os dereitos de uso, difusión, distribución e reprodución da obra presentada para a súa posíbel publicación nunha edición de carácter non venal, ou sempre que responda a fins promocionais ou culturais.

Os traballos non premiados poderán ser recollidos polos/as autores/as no Decanato ata o remate do ano 2020. Unha vez rematado o ano, os traballos non recollidos serán destruídos.

7. Entrega de premios

A CNL organizará un acto de entrega de premios, que se celebrará no mes de decembro de 2020.

8. Aceptación das bases

A presentación ó concurso implica a plena aceptación da totalidade das súas bases e do veredicto do xurado.

A CNL reserva para si o dereito de facer modificacións e tomar iniciativas non recollidas expresamente nestas bases, sempre que contribuíren á mellora do concurso e non alteraren a súa esencia.

A organización non se fai responsábel respecto a plaxios, vulneración dos dereitos de autoría dos textos, así como calquera outra transgresión da lei.